



Aleqa Hammond  
Inatsisartunut Ilaasortaq  
/maani

## § 37 2012/212 – Bootcamp pillugu akissut

Asasara Aleqa Hammond

Inatsisartut suleriaasianni § 37, imm. 1 naapertorlugu apeqquteqaatinnut qujanarsuaq, taakkua uani ataani akissutissaqartinniassavakka.

Akissutikka apeqqutit ataasiakkaat ataanni atuarsinnaavatit.

*Naalakkersuisunut apeqqutit:*

1)

*Naalakkersuisooqatigiinnik meeqqanut ikiorserneqartariaqartunut suliniarnerminni toqqarsimavaat Bootcamp, taannalu tunngaveqarpoq Nunatta avataaneersuinnarnit suliassamik kivitsisunik, tamanna avataaneersuinnarnik atuneq sumik tunngaveqarpa?*

**Akissut:** Paatsoorneruvoq inuit avataaneersuinnaat suliniummut Bootcamp-imut attuumassuteqarnerannik paasinnineq. Nerisassat maani pisiarineqartarlutillu maani najugaqavissunit suliarineqartarput. Kiisalu suliniummut ulluinnarni attuumassuteqartutik suleqataasut ilaat Nuummi najugaqavissuullutik. Pingaaruteqarpoq paasissallugu Naalakkersuisut suliniummi imaritinneqartut isiginiarnerusimammagit, ilusaa pingaarnerutinngagu. Tassalu tamanna ima paasineqassaaq, uagut naalakkersuinikkut kissaateqartugut meeqqat inuusuttuaqqallu ilinniartitaanermut uteqqinnissaat sulissutigineqasasooq, aamma pisariaqarfiisigut avataaniit isummersorneqarneq iluaqutigalugu.

Taamatuttaaq avataaniit isummersorneqarneq taamani Naalakkersuisuusut iluaqutigaat Nunanit avannarlernit, USA-mit New Zealand-imiillu isummersorneqarneq iluaqutigalugu atuarfeqarnikkut iluarsaaqqinneq aaqjissuukkamikku. Meeqqat atuarfianni aallartitarneq sioqqullugu meerartatsinnik meeqqerivitsialammi sullissinermi iluarsaaqqinnermi ilaatigut Hawaii-imiit isumassarsiat iluaqutigineqarput. Taamaattumik suliniutini avatitsinniit isumassarsiorarneq nutaajunngilaq, aammalu mattunneqarsinnaanngilaq si-unissami aalajangiisartunngorumaartut nunarsuup sinneraniit suliniutaasunit isumasarsiorarnissaat.

05. oktober 2012  
Sagsnr. 2012-074402  
Dok. Nr. 1030518

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: iin@nanoq.gl  
www.nanoq.gl

2)

*Kisitsinermut ilinniartitsisussaq toqqarneqarsimavoq tassaasoq professori, tamanna meeqqanut ilinniartitassanut atorneqartussanngortinneranik peqquteqarpa ilinniartitsisinnaasumik kisitsinermi nunatsinni atugaqartoqarsinnaanngitsoq?*

**Akissut:** Soorlu ilisimaneqartoq Kalaallit Nunaanni matematikkimut tunngasunik ilinniartitsisunik assut amigaateqarpugut. Taamaattumillu ilinniartitsisumik avataaneersumik toqqaanitsigut ulluinnarni ilinniartitaanermi nukinnik atorfissaqartinneqareersunik tigusinggilagut.

Ilinniartitsisoq pineqartoq tamatuma saniatigut aamma inuusuttuaqqanut skakkernermik ilinniartitsisuuvoq.

3)

*Tilluuttartoq nunarsuarmi pissartaasimasoq atorneqarpoq, maani nunatsinni tilluuttartut peqatigiiffii atorneqarsinnaasutut nalilerneqanngillat imaluunniit neqeroorfigineqarsimappat?*

**Akissut:** Naalakkersuisut suleqatigineqartussanik imaluunniit inunnik immikkut suliniuummi pisariaqartinneqartunik toqqartuisuunngillat. Suliffeqarfik pineqartoq nammineerluni taamaaliortoq. Naalakkersuisut ilinniartitaanermut ilisimatusarnermullu Naalakkersuisoq aqqutigalugu maani tilluuttartut klubbiannit sinniisunik ataatsimeeqateqar-nikuuvoq, ataatsimiinnermilu tassani paasiniarneqarpoq taakkua suliniummut peqataanissaminnut imaluunniit tapersersuisuunissaminnut soqutiginninersut, suliniutit suli pilersaaruserneqarnerata nalaani. Soqutiginnilluni utimut nalunaarut suliffeqarfim-mut maanna suliniummik ingerlatsisuuusumut nalunaarutigineqarpoq.

4)

*Meerartatsinnut ilinniartitsisussat toqqarneqarsimasutt suut oqaatsit atorlugit ilitser-sorneqarpat?*

**Akissut:** Uanga nammineerlunga pffissami atuartitsiviusumi alakkaagama, danskit oqaasii atorlugit ingerlatsisoqarpoq, kisianni sungiusaasunik – instruktørinik – kalaallisut oqaasilinnik aamma isersimasoqarpoq. Taamaasillunilu danskisut kalaallisullu ingerlats-isoqarsinnaavoq, soorluttaaq nerisassioortumut kalaallisut aamma saaffiginnittoqartartoq. Peqataasut namminneq akunnerminni kalaallisut oqallipput.

5)

*Naalakkersuisut pilersaarutigaat sineriammi aamma bootcamp ingerlanneqassasoq, tamanna aamma avataaneersuinnarnik ingerlanneqarnissaa politikkerineqarpa?*

**Akissut:** Naalakkersuisut neriutigaat naatsorsuutigalugulu suliniut pineqartoq nunatta sineriaani suliniutaalerumaartunut qiimassaataajumaartoq, suliniummilu periaaseri-neqartut siaruarterneqarumaartut. Suliniutinik ingerlatsilerumaartut aamma inunnik ilisimasalinnik nunanit allaneersunik atuiniarumaarnersut soorunami uanga ilisimasaqar-figinngilara.

6)

*Naalakkersuisooqatigiit taamatut meeqqanut immikkut sammineqartariaqartunut sulinerminni nunatta avataaneersuinnarnik nunarsuarmi pissartanik aammalu professorinik atuinerat politikimik sumik tunngaveqarpa?*

**Akissut:** Soorlu aamma inimi akissutigineqartoq, Naalakkersuisut anguniangaraat meeqqat inuusuttuaqqallu sapinngisamik amerlanerpaat ilinniartitaanermut uteqqinnissaannut ikiorneqarnissaat, sulinissatsinnut killiliussaasut iluanni.

Suliniummik suliassinneqarlutik ingerlatsisuulertarumaartut avataaneersunik piginnaanernik pisariaqartinneqartunik atuillutik ingerlatsisarumaarnersut, soorunami uanga tunngavissaqanngilanga akissuteqarfignissallugu.

Kisianni Naalakkersuisut kissaatigalugulu anguniagaraat siunissami Bootcamps-it maani aallaaveqarumaartut. Tamannali ilaatigut periarfissaqartassanngikkaluarpat, kisiannili meeqqat inuusuttuaqqallu ikiorserneqarnissaat ersarissumik pisariaqartinneqartillugu Naalakkersuisut tunuarsimaartarniannigillat nukinnik meeqqat inuusuttuaqqallu ikiorserneqarnissaannut suliaqarsinnaasunik atuisarnissaminnut.

Naalakkersuisunit siusinnerusukku ilisimatitsissutigineqareersutulli anguniagaavoq meeqqat inuusuttuaqqallu suli amerlanerusut inuussutissarsiutitigut ilinniagaqartalernissaat, taamaaliornikkut siunissami aalajaatsumik suliffeqarnissaminnut qularnaatsumik aqqutissiuunneqarsinnaaqqullugit.

Taamaaliornikkummi toqqammavissat pilersinneqassapput, siunissami Kalaallit Nunaata sulisinnaasunik piginnaanilinnillu sulisussaqaarnissaanut, taamalu assersuutigalugu danskit naalagaaffianniit akisussaaffinnik suli amerlanerusunik tiguisinnaangorluta.

Naalakkersuisummi isumaat naapertorlugu taamatut ingerlatsineq Namminersulernitta anersaavanut naapertuulluinnarpoq.

Inussiarnersumik inuulluaqqusilluta

Med venlig hilsen



Palle Christiansen